

M115: Baumgartenberger Johannes Baptista

- 0,1 die tôten hiez er ûf stân .
0,2 die miselsuht hiez er ab gân .
0,3 die dâ lâgen an der vergihtē .
0,4 wie drâte er si ûf rihhte .
0,5 dem blinden er daz licht gap .
0,6 necheiner miete er ne pflac .
0,7 die gebundenen zungen .
0,8 die zelôste er dem stummen .
0,9 diu touben ôren er entslôz .
0,10 dâ wart diu vrôuwede vile grôz .
0,11 des heiligen mannes .
0,12 des guoten sante Johannes .
0,13 die wîssagen dô vore sageten .
0,14 alsô si vernomen habeten .
0,15 von dem heiligem geiste .
0,16 der bewîste si der liste .
0,17 dâ si die juden mite lêrten .
0,18 daz si sich bekêrten .
0,19 unze an sante Johannes zît .
0,20 dô wart ein michel strît .
0,21 wie si die hêbrêischen ê .
0,22 solten verstên .
0,23 alsô geistlîchen .
0,24 daz begunde in harte misselîchen .
0,25 dô wolten si Moysen lesen .
0,26 mit ime wolten si genesen .
0,27 Moyses der gehiez in ertrîche .
0,28 Johannes der gehiez in daz himelrîche .
0,29 Moyses der gebôt in daz si an ire vîanden næmen den sigenunst .
0,30 Johannes zeigte in die gotes kust .
0,31 Moyses der riet in daz si an ire vîande râche næmen .
0,32 Johannes der riet in daz si ire vîande vergæben .
0,33 Moyses der riet in daz si sich besniten .
0,34 nâch hêbrêischem site .
0,35 Johannes der riet in daz sich toufeten .
0,36 unde an den geloubten .
0,37 der allez mankünne
0,38 von der helle gewünne .

0,39 der strît was sô lange .
0,40 des mahte dô harte belangen .
0,41 die dô dâ wâren .
0,42 daz sage ich ze wâre .
0,43 der guote sante Johannes den sic nam .
0,44 ime volgete manic wîp unde man .
0,45 nû wile ich iu sagen abe sâ .
0,46 von sancto Johanne [Baptista] .
0,47 eines tages dô [stuont] [er] abe dâ .
0,48 dâ unser hêrre selbe vûre gie
0,49 niht langer er ne lie .
0,50 er winkete im mit dem vinger .
0,51 er sprach zuo sînen jungeren .
0,52 die dâ sâzen unde stuonden .
0,53 er sprach “nû sehet ir hêrren guote .
0,54 ditze ist daz gotes lamp .
0,55 vile michel ist der sîn gewalt .
0,56 daz unser bûrde sol tragen .
0,57 ze wâre ich iz iu sage .
0,58 sîn vater hât iz her gesant .
0,59 in ditze ellende lant
0,60 in ditze zehere tal .
0,61 durch Adâmes val .
0,62 durch unser bloede unde unser wênicheit .
0,63 iz ist dem tiuvel vile leit .
0,64 zuo ime hât er necheine minne
0,65 er trûwet im her nâch grôzen schaden gewinnen .”
0,66 dô unser hêrre .
0,67 begunde selbe predigen unde lêren .
0,68 sîne holden in dô bâten .
0,69 daz er in kunt tæte .
0,70 umbe den hêrren Eliam
0,71 des antwurte er in vile vram .
0,72 er sprach “nû vernemet daz wâr ist .
0,73 Elias komen ist
0,74 die liute sîn niht erkanten
0,75 wie harte si in dô schanten”
0,76 mîn trehtîn sprach in abe zuo
0,77 “ir schulet iz rehte –[...]”